

TOSHKENT OQSHOMI



Газета 1966 йил 1 июлдан чиқа бошлаган

№ 43 (14,146) 26 ОКТЯБРЬ, ПАЙШАНБА 2023 ЙИЛ

Шаҳар ижтимоий-сиёсий газетаси



vtto.uz



vtto_uz@mail.ru




[@Toshkent_oqshomi](https://www.instagram.com/Toshkent_oqshomi)



[Toshkent oqshomi](https://www.facebook.com/Toshkent_oqshomi)



[Toshkent Oqshomi_24](https://www.telegram.com/Toshkent_Oqshomi_24)



АНОНС



**UNWTO БОШ АССАМБЛЕЯСИ
СЕССИЯСИ ИЛК БОР
ЎЗБЕКИСТОНДА ЎТКАЗИЛДИ**



**ЯХШИДАН БОҒ ҚОЛАДИ,
ЁМОНДАН ДОҒ**



**ЯНГИ ЎЗБЕКИСТОН
МАКТАБ ОСТОНАСИДАН
БОШЛАНАДИ**

ЯХШИДАН БОҒ ҚОЛАДИ, ЁМОНДАН ДОҒ

Мамлакатимизда аҳоли фаровонлигини оширишга қаратилган кенг кўламли ислохотлар олиб борилмоқда. Турмуш даражасини яхшилаш фақатгина иқтисодий ёки ижтимоий муаммоларнинг ечими билангина чекланиб қолмайди.

Аҳоли саломатлиги, умр кўриш давомийлигини оширишга қаратилган ҳаракатларнинг туб замирида экологик муаммоларга ечим топиш ётади. Маълумки, йилдан йилга бутун дунёда глобал иссиқ муаммоси ошиб бормоқда. Бу эса сув танқислиги, ҳаво ҳароратининг кўтарилиши, зарарли газларнинг атмосферада тўпланиб қолишига олиб келади. Натижада аҳоли саломатлиги, ёш болалар ва катталар соғлиги учун хавфли касалликларнинг келиб чиқишига сабаб бўлади.

Шу каби салбий ҳолатларнинг олдини олиш мақсадида бутун дунёда муҳим қарорлар қабул қилинмоқда. Юртимизда ҳам Президентимиз Шавкат Мирзиёев томонидан “Яшил макон” умуммиллий лойиҳаси тақдим этилди. Ушбу лойиҳа доирасида йилига 200 миллион туп дарахт ва бута кўчатларини экиш орқали шаҳарлардаги яшил майдонларни амалдаги 8 фоиздан 30 фоизга ошириш режа қилинган. “Яшил макон” умуммиллий лойиҳаси доирасида йилига 200 миллион туп дарахт ва бута кўчатларини экиш, шу орқали шаҳарлардаги яшил майдонларни ҳозирги 8 фоиздан 30 фоизга ошириш режалаштирилган. Лойиҳа доирасида мамлакатимиз шаҳарларини аҳолига қулай, экологик тоза ва яшаш учун барча имкониятлар мавжуд бўлган ҳудудга айлантириш, уларнинг кўкаламзорлаштириш даражасини 30 фоизга етказиш, шаҳар ва туман марказларида ҳар 50-100 минг аҳоли учун “жамоат парклари”ни ташкил этиш кўзда тутилган. 2021 йилнинг кузида 85 млн. дона кўчат ўтказилди. Кўплаб ташкилотлар, маҳаллалар, умуман, кенг жамоатчилик бу савобли ишда жонбозлик кўрсатди. 2022 йил баҳор мавсумида 125 млн. дона дарахт кўчатлар экилди.

Куни кеча давлатимиз раҳбари бу йилги кузги дарахт экиш мавсумини Чилонзор туманига ташрифи чоғида “Оқтепа” МФЙ ҳудудида бошлаб берди. Ушбу ташаббуснинг давоми ўлароқ, пойтахтимизда элимиз ардоғидаги санъаткорлар, спортчилар, Экология бошқармасининг ходимлари ва ҳудудда яшовчи ёшлар ҳам ўз ҳудудларига кўчатлар экишни бошлаб юборишди.

Дилшод САЪДИЕВ,

Тошкент шаҳар Экология, атроф-муҳитни муҳофаза қилиш ва иқлим ўзгариши бошқармасининг Чилонзор тумани бўлими бошлиғи:

– “Яшил макон” лойиҳаси доирасида кузги дарахт экиш жараёнларини маҳалла фаоллари ва ёшлар билан биргаликда бошлаб юбордик. Чилонзор тумани мисолида айтадиган бўлсам, бу ҳудудда 94 минг туп дарахтни экиш белгиланди. Бундан 40 мингтаси маҳалла ҳудудларида, 54 мингтаси эса ижтимоий соҳа объектлари ҳудудида экилиши белгиланди. Ҳар битта дарахтни униб, ўсиб кетишини бизга тақдим этилган планшетлар орқали назорат қилиб борамиз. Махсус платформада дарахтларнинг жойлашган ўрни билан белгилаб борамиз.

Туризм ва маданият масканлари имкониятларини тўлиқ ишга солиш, “Яшил макон” кузги мавсумини самарали ташкил этиш бўйича бўлиб ўтган видеоселектор йиғилишида устувор вазифалар белгилаб олинди. Унга кўра, “Яшил макон” умуммиллий лойиҳаси доирасида жорий йил 25 октябрдан 1 декабргача кузги дарахт экиш мавсуми эълон қилинади. Унда жами 85 млн. туп кўчат экилади. Барча туман ва маҳаллаларда кўчат ярмаркалари ташкил этилади. Кўчат тури аҳоли билан бамаслаҳат танланган ҳолда ярмаркалар орқали аҳолига 30 млн. туп кўчат етказиб берилади. Ўрмон хўжалиги агентлиги томонидан ҳар бир маҳаллага 200 тадан кўчат бепул етказиб берилади. Автомобиль, темир йўл, дарё, каналлар ёқалари дарахт экиш учун аҳоли ва тадбиркорларга шартнома билан ер тоифасини ўзгартирмасдан бўлиб берилади. Ҳар бир вилоят ҳокимлиги томонидан 300 минг дона кўчат маҳаллаларга текин тарқатилади.

Ўрмон хўжаликларига 5 млн. дона дарахт экилади. Чиқинди полигонлари атрофида ва йирик саноат корхоналари ҳудудида яшил белбоғ яратилади. Богча, мактаб, олийгоҳ ва шифохоналар ҳудудида 3,5 млн. дона кўчат экилади. Оролнинг қуриган тубида 100 минг гектарда “яшил қоплама”лар барпо этилади. Дала четларида 20 млн. туп терак, тут ва узум кўчатлари экилади.

Давлатимиз раҳбари таъкидлаганидек, “Яшил макон” умуммиллий лойиҳаси – бу бир йиллик тадбир эмас”. Дарҳақиқат, доно халқимиз бежизга: “Яхшидан боғ қолади, ёмондан доғ” деб айтмаган. Биздан кейинги авлодга гуллаб-яшнаган шир Ватанни қолдириш барчамизнинг бурчимиздир. Соф табиатдан баҳра олишга келажак авлоднинг ҳам ҳаққи борлигини унутмайлик!

Умида ҲАҚБЕРДИЕВА



ННТларнинг Миллий форуми ўтказилди



Жорий йилнинг 25 октябрь куни “Ренессанс” кино уйининг анжуманлар залида Ўзбекистон нодавлат нотижорат ташкилотлари миллий ассоциацияси (ЎзННТМА) ва Ўзбекистон нодавлат нотижорат ташкилотларини қўллаб-қувватлаш Жамоат фонди томонидан Инсон ҳуқуқлари бўйича Ўзбекистон Республикаси Миллий маркази, Ўзбекистон Республикаси Адлия вазирлиги, “Юксалиш” УМХ, Ўзбекистон Республикаси Олий Мажлисининг Инсон ҳуқуқлари бўйича вакили (Омбудсман), Ўзбекистон Республикаси Бош прокуратураси ва бошқа манфаатдор давлат органлари ва ННТлар ҳамкорлигида “Инсон ҳуқуқлари ва манфаатларини таъминлашда нодавлат нотижорат ташкилотлари ва давлат органларининг ҳамкорлиги” мавзусида нодавлат нотижорат ташкилотларининг Миллий форуми ташкил этилди.

Форумда миллий ва хорижий экспертлар, соҳага алоқадор вазирлик ва идоралар ҳамда ҳудудлардаги ЎзННТМА бўлинмалари ходимлари ва нодавлат нотижорат ташкилотлари вакиллари иштирок этди.

Форум доирасида яратилган давлат органлари ва фуқаролик жамияти институтлари ўртасидаги умумий мулоқот платформасида Инсон ҳуқуқлари бўйича Ўзбекистон Республикасининг Миллий стратегияси ҳамда 2021 — 2025 йилларда фуқаролик жамиятини ривожлантириш Концепцияси ижросини таъминлаш ҳамда ННТларнинг инсон ҳуқуқларини ҳимоя қилиш бўйича фаолиятини қўллаб-қувватлаш механизмларини янада такомиллаштириш масалаларини муҳокама қилиш, улар бўйича мамлакатимиз фуқароларига хизмат қиладиган таклиф ва қарорлар қабул қилиш учун соҳа вакиллари яна жам бўлди.

Маълумки, инсон ҳуқуқлари бўйича Ўзбекистон Республикасининг Миллий стратегияси қабул қилинди. Уни амалга ошириш бўйича “Йўл харитаси”нинг жами 78 бандидан 62 банд бўйича ишлар бажарилган, 16 бандни амалга ошириш бўйича ишлар давом этмоқда.

Шунингдек, 2022 — 2026 йилларда хотин-қизларнинг мамлакат иқтисодий, сиёсий ва ижтимоий ҳаётининг барча жабҳаларида фаоллигини ошириш бўйича Миллий дастур тасдиқланди.

Яна имконияти чекланган ва ногиронлиги бўлган шахсларнинг бандлигига кўмаклашиш Миллий дастури тасдиқланди. Унга кўра, 2022 йилда 12146 нафар имконияти чекланган ва ногиронлиги бўлган шахслар бандлигига кўмаклашиш белгиланиб, ногиронлиги бўлган шахсларни ишга қабул қилган иш берувчиларга ҳар бир ходим учун 6 ой давомида ҳар ойда базавий ҳисоблаш миқдорининг 1,5 баравари миқдориде субсидия берилиши мустаҳкамланди.

Яна бугун мамлакатда болалар меҳнатига батамом барҳам берилди. Мажбурий меҳнатга жалб қилиш ҳолатлари кескин қисқарди, одам савдоси қурбонлари учун бошлана ташкил қилишга маблағ ажратиш масаласига алоҳида эътибор қаратилди.

Қолаверса, 2021 йил 7 июнда Ўзбекистонда қонун ижодкорлигида илк бор ноёб тажриба қўлланилди. Яъни “Ногиронлар ҳуқуқлари тўғрисида”ги конвенция дастлаб миллий қонунчиликка имплементация қилиниб, шундан кейин ратификация қилинди.

Амалга оширилган ишлар сарҳисоби сифатида жорий йилнинг 28 июль куни БМТнинг Ногиронлар ҳуқуқлари тўғрисидаги конвенцияси бажарилиши бўйича Ўзбекистон Республикасининг биринчи миллий маърузаси тақдим этилди.

Мазкур ислохотлар давомийлигини таъминлаш мақсадида форум ялпи мажлисида сўз олганлар инсон ҳуқуқлари ва эркинликларини таъминлашда давлат органлари ҳамда ННТларнинг ўзаро ҳамкорлигида эришилган натижалар ва ривожланиш истиқболлари ҳамда ННТларнинг соҳага оид ташаббуслари ва уларни молиявий қўллаб-қувватлаш масалаларида маърузалар қилиб, фикр-мулоҳаза алмашдилар.

Шунингдек, 2030 йилгача бўлган даврда Ўзбекистоннинг Барқарор ривожланиш мақсадларига эришишида парламент ва фуқаролик жамияти институтларининг ўрни ва ролини ошириш, болалар ҳуқуқ ва манфаатларини таъминлашда инсон ҳуқуқлари бўйича Миллий институтлар ва ННТларнинг аҳамияти, ногиронлиги бўлган шахсларга қулай муҳит яратиш ва ижтимоий интеграцияни амалга оширишда ННТларнинг ролини кучайтириш, ОАВнинг ҳуқуқ ва эркинлигини таъминлаш, инсон ҳуқуқлари соҳасидаги халқаро мажбуриятларнинг лозим даражада бажарилишида давлат органлари ва фуқаролик жамияти институтларининг ҳамкорлигини мустаҳкамлаш масалалари эътибор марказида бўлди.

“СОҒЛОМ АВЛОД УЧУН”



“Соғлом авлод учун” халқаро хайрия фонди Ўзбекистон Республикаси Президентининг 1993 йил 23 апрелдаги 596-сонли Фармони билан ташкил этилган бўлиб, келажак авлод саломатлигини таъминлаш, оналик ва болаликни муҳофаза қилиш, ёш авлодни жисмоний, интеллектуал ва ахлоқий ривожланиши учун қўлай шарт-шароитлар яратишга қаратилгандир.

Маълумки, давлатимиз раҳбари жорий 2023 йилни “Инсонга эътибор ва сифатли таълим йили” деб эълон қилган эди. “Соғлом авлод учун” халқаро хайрия фонди ҳам давлат ижтимоий сиёсатининг долзарб муаммоларини ҳал этишда фаол иштирок этмоқда. Шу мақсадда фонд томонидан биринчи навбатда болалар, ёшлар ва туғиш ёшидаги аёллар иштирокида бир қатор тиббий, мурувват ва маърифий лойиҳалар амалга оширилмоқда.

Жумладан, 1998 йилда Ҳукумат номидан “Соғлом авлод учун” фонди “Она ва бола скрининги” миллат генофондини сақлаш бўйича Давлат дастури ташаббуси билан чиқди, унинг асосий мақсади ҳомила ва янги туғилган чақалоқларда ирсий ва туғма касалликларни аниқлаш, уларни даволаш ва болалиқдан ногиронлар туғилишини олдини олишдир.

2023 йил 8 сентябрда Ўзбекистон Республикаси Президентининг “Оналар ва болалар саломатлигини муҳофаза қилиш, аҳолининг репродуктив саломатлигини мустаҳкамлаш чора-тадбирлари тўғрисида”ги ПҚ-296 сонли қарори қабул қилинди. Унда 2023-2028 йилларда болаларда туғма ва ирсий касалликларни эрта аниқлаш чора-тадбирлари кўзда тутилган, шунингдек, тиббий генетика соҳасида замонавий технологияларни жорий этиш режалаштирилган, бу республикамиз генофондини сақлаш ва яхшилаш имконини беради.

Ҳукуматнинг ушбу қарорларига мувофиқ “Соғлом авлод учун” фондига скрининг марказларини юқори технологияли ускуналар, диагностика тўпламлари, дори-дармонлар, тиббий овқатланиш ва малакали кадрлар тайёрлаш бўйича “Она ва бола” скрининг дастурларини амалга ошириш топширилди. Бугунги кунда ишонч билан айтиш мумкинки, ушбу Давлат дастурлари доирасида Ўзбекистонда Германия, Буюк Британия, Дания, Финляндия, Хитой, Туркия, Россия каби ривожланган давлатлар билан бир қаторда, ирсий касалликларни аниқлаш ва даволаш ҳамда туғма нуқсонли болалар туғилишининг олдини олишга имкон берадиган барқарор тизим яратилди. Бу ҳақиқатдан Республикада 2000 йилга нисбатан генетик касалликлар частотаси ва туғма нуқсонли болалар сони 2,5 баробар камайгани ва умуман, мамлакат генофондида яхшиланиш кузатилаётганини тасдиқлайди.

Ўзбекистон Республикаси Вазирлар Маҳкамасининг 1996 йил 22 февралдаги “Ўзбекистон Республикасида тиббий-ижтимоий ёрдам бригадаси тизимини ташкил этиш тўғрисида”ги 71-сонли қарори асосида тиббий ижтимоий ёрдам бригадаси фаолияти йўлга қўйилди. 1996 йилдан 2023 йилнинг ўтган 9

ойи мобайнида Фонднинг кўчма тиббий-ижтимоий ёрдам гуруҳлари ҳудудий ҳокимликлар, хотин-қизлар кўмитаси, маҳалла кенгашлари ва соғлиқни сақлаш муассасалари кўмагида 1500 та республиканинг энг чекка қишлоқлари ва 4000 дан ортиқ маҳаллаларидаги 808115 оила аъзоларини психологик ва саломатлик ҳолатини тизимли ўрганиб чиқди. Тиббий кўрикда 5 миллион 807 мингдан ортиқ кишини, шу жумладан 1 миллион 686,6 минг болаларни, 778,9 минг ўсмирни ва 3 миллион 11,3 минг аёлларни қамраб олди.

1997-2023 йиллар мобайнида “Соғлом авлод учун” халқаро хайрия фонди жами 582 та инсонпарварлик юкларини (халқаро инвестициялар) қабул қилиб олган бўлиб, ҳар йили республика бўйлаб 400 та тиббий-профилактика муассасалари, “Меҳрибонлик”, “Мурувват” уйлари ва ихтисослаштирилган мактаб-интернатларга етказиб бериладиган инсонпарварлик юклари тарқатилмоқда.

“Соғлом авлод учун” халқаро хайрия фонди томонидан 1997-2023 йиллар мобайнида халқаро ҳамкорлардан дори-дармон, тиббий буюмлар, озик-овқат, тиббий асбоб-ускуналар (инвестициялар) шаклида жалб қилинган инсонпарварлик юкларининг ҳажми 615,9 миллион АҚШ долларини ташкил этди.

“Соғлом авлод учун” халқаро хайрия фонди Корея Республикаси, Америка Қўшма Штатлари, Германия Федератив Республикаси, Туркия Республикаси, Россия Федерацияси, Хитой Халқ Республикаси, Сингапур, Швейцария, Финляндия Республикаси каби давлатлар билан халқаро ҳамкорлик алоқаларини йўлга қўйган.

2009-2023 йиллар давомида Германия ва Швейцариядан жалб қилинган грант маблағлари ҳисобидан Ўзбекистон Республикаси ва чет элларда туғма юрак нуқсонларини бартараф этиш бўйича жарроҳлик амалиёти ўтказилган беморлар жами 1359 нафарни ташкил этди.

2010 йилдан бошлаб Фонд Ўзбекистонга озик-овқат ёрдами бўйича халқаро ҳамкорлиги доирасида USAID (АҚШ)нинг Resource & Policy Exchange ННТ билан ҳамкорликда “Тинчлик учун озик-овқат дастури” доирасида қурилган сабзавотли шўрвалар кўринишидаги мурувват юклар билан таъминлаш бўйича амалга ошириб келмоқда, 2010-2023 йиллар давомида Ўзбекистон Республикасининг барча ҳудудларида жойлашган ихтисослаштирилган тиббиёт ва ижтимоий муассасалари ва “Мурувват” ва “Саховат” уйларида жами миқдорда 1 минг 557,96 тонна сабзавотли шўрвалар 4 миллион 423,5 сўмлик инсонпарварлик юклар тариқасида тарқатилди.

АҚШ ҳукуматининг USAID табиий офатларга ёрдам бериш бошқармаси (USAID/OFDA) орқали 100 минг АҚШ доллари миқдоридаги молиявий ёрдами ва “Resource & Policy Exchange” (АҚШ) ННТ ёрдами билан Фонд пандемия даврида (2020 йил май-июнь ойлари) Сирдарё вилоятидаги Сардоба сув омбори фожиасидан жабрланган оилаларга ёрдам беришга қаратилган лойиҳани амалга оширди. Лойиҳа давомида тўфондан эвакуация қилинган 2000 дан

ортиқ оилаларни асосий эҳтиёжлар, жумладан, озик-овқат, кўрпа, гигиена воситалари билан таъминланди.

USAIDнинг “Марказий Осиёда сил касаллигини йўқ қилиш” этикаси лойиҳаси доирасида “Соғлом авлод учун” фонди 2021 йил мартдан 2023 йил сентябргача бўлган даврда “Resource & Policy Exchange” (АҚШ) ННТ билан ҳамкорликда заиф одамлардаги сил касаллигини даволашнинг олдини олиш, аниқлаш ва профилактика бўйича аҳолининг сегментлари доирасида кўп тармоқли жамоалар фаолияти лойиҳанинг таркибий қисми амалга оширилди. Жиззах, Сирдарё ва Фарғона вилоятларида кўп тармоқли жамоалар ташкил этилди. Сил касаллигининг олдини олиш чоралари ОИВ инфекцияси билан яшайдиган одамлар, алоқалар ва муҳожира заиф гуруҳларни қамраб олди. Лойиҳа даврида аҳолининг заиф қатламлари вакиллари (44853 эркек, 21601 аёл) ўртасида жами 23252 скрининг текширувлари ўтказилди. Улардан 16215 (7552 эркек, 8663 аёл) сил касаллиги бўйича текширилди, улар орасида 554 янги сезгир ва чидамли сил касаллиги, шунингдек, 94 яширин сил касаллиги аниқланди. Сил касаллиги масалалари бўйича 43542 та индивидуал ва гуруҳли мини-сессиялар ўтказилди.

Ўзбекистон Республикаси Соғлиқни сақлаш вазирлиги, “JCI Korea” халқаро ёшлар ташкилоти, “Ча” тиббиёт университети қошидаги “Пундан Ча” шифохонаси ҳамда “Соғлом авлод учун” фонди ўртасида тузилган уч томонлама битим доирасида 2009-2019 йиллар давомида Тошкент Педиатрия тиббиёт институти клиникасида туғма юрак хасталиги билан оғриган беморларнинг 275 нафари тиббий кўриқдан ўтказилди, улардан 87 нафар бола хайрия асосида Корея Республикаси клиникаларида муваффақиятли операция қилинди.

Ўзбекистон Республикаси Соғлиқни сақлаш вазирлиги, Ин Ха университети касалхонаси ва “Соғлом авлод учун” фонди ўртасида 2010 йил сентябрь ойида имзоланган соғлиқни сақлаш соҳасидаги ҳамкорлик тўғрисидаги уч томонлама битим доирасида 2010-2018 йиллар давомида Ин Ха университети шифохонаси мутахассислари томонидан жами 8430 нафар аҳоли тиббий кўриқдан ўтказилган, шундан 10 нафари Корея Республикаси клиникаларида операция қилинган. Бундан ташқари, ушбу шифохонадан умумий қиймати 224,0 минг АҚШ доллар бўлган дори-дармон ва тиббий буюмлар кўринишидаги инсонпарварлик ёрдами юклари олинди.

Бир сўз билан айтганда “Соғлом авлод учун” халқаро хайрия фонди мамлакатимизда амалга оширилаётган, асл моҳияти фарзандларимизга бахтли ҳаёт, чексиз меҳр-муҳаббат ва қувонч бахш этиш учун энг қўлай шароит ҳамда хориждаги қўлаб имконият яратишдан иборат бўлган улуғ ишларнинг бевосита иштирокчиси саналади. Фурсатдан фойдаланиб, Фондни 30 йиллиги билан муборакбод этамиз ва келажак авлод саломатлигини таъминлаш йўлидаги шарафли фаолиятида омад тилаймиз!

Шоҳида ЗУФАРОВА тайёрлади



ЯНГИ ЎЗБЕКИСТОН МАКТАБ ОСТОНАСИДАН БОШЛАНАДИ

Ўсиб келаётган ҳар бир бола ҳаётда ўз ўрнини топиши учун албатта илм олмоғи шарт ва зарур. Шиддат билан ривожланаётган айти асрда интеллектуал билим ва салоҳиятга эга, чет тилларини яхши ўзлаштирган кадрларга бўлган талаб жуда юқори.

Негадир сўнги йилларда айрим ёшлар тезроқ даромад топиш мақсадида таълим олишга унчалик ҳам интирмай қўйишди. Бу эса олийгоҳларга кириш имтиҳон балларида яққол намоён бўлмоқда. Давлатимиз раҳбари буни дарҳол пайқайди ва ўз назоратига олди. Президент энг аввало таълим тизимини тубдан ислоҳ қилишга қаратилган чоратadbирларни ишлаб чиқишга киришди. 2023 йилни “Инсонга эътибор ва сифатли таълим йили” деб номлангани ҳам бунинг яққол ифодасидир. Шавкат Мирзиёев таълим тизимини ислоҳ қилишни ўрта мактаблардан бошлади.

Энг аввало, мактаблар учун янги дарсликлар тайёрланди ва мактаб ўқувчилари учун бепул тақдим этилди. Синф хоналари замонавий электрон доскалар компьютерлар билан жиҳозланди. Педагог ходимларнинг ўқув малакаларини ошириш ва сифатли таълим беришни таъминлаш мақсадида турли ўқув курслари жорий этилди. Зеро, “Янги Ўзбекистон мактаб остонасидан бошланади”, деган шиор бежиз эмас. Бу мамлакатимизда таълимга қаратилаётган эътиборнинг, соҳани халқаро мезон ва талаблар асосида такомиллаштириш мақсадида бошланган ишларнинг асосини ташкил этувчи катта мақсаддир. 2023 ўқув йилидан бошлаб хорижий тилларни ўрта мактабларда чуқур ўргатиш мақсадида яна бир янги тажриба жорий этилмоқда. Айти вақтда Президентимиз ташаббуслари билан юртимизга 500 нафар малакали ва тажрибали хорижий ўқитувчи жалб қилинди ва улар ҳозирда республикамиздаги мактабларда ўқувчиларга таълим бермоқдалар. Жумладан, Олмазор туманидаги 16-умумтаълим мактабига ҳам Ҳиндистондан ташриф буюрган Даня Сандатил Вижаян сентябрь ойидан буён мактаб ўқувчиларига инглиз тилидан сабоқ бермоқда. Даня Сандатил инглиз тили ва адабиёти бўйича етук мутахассис бўлиб, халқаро тоифадаги TESOL, TEFL, BETT ва IELTS сертификатларига эга. Биз унинг мамлакатимиз, мактабларимиздаги шарт-шароитлар, ўқув жараёнлари ва ўқувчилар ҳақидаги фикрларини билиш мақсадида суҳбатга чорладик.

– Ассалому алайкум. Ўзбекистонга хуш келибсиз! Даня билишимча, бу юртимизга биринчи ташрифингиз экан. Суҳбатимиз бошида Ўзбекистон ҳақидаги илк таассуротларингиз билан бўлишсангиз.

– Ваалайкум ассалом. Раҳмат. Ҳа, бу юртингизга биринчи ташрифим. Биласизми, келмасимдан аввал Ўзбекистон ҳақида фикрларим ўзгача эди. Аммо, бу ерга келгач, фикрларимнинг мутлақ аксини кўрдим. Юртингиз жуда чиройли экан. Кенг кўчалар, замонавий иншоотлар осмонўпар бинолар, худди ривожланган давлатларникидай жамоат транспортлари, гигант супермаркетлар ва энг асосийси самимий ва меҳмондўст одамларингиз

менда жуда яхши таассуротлар уйғотишди. Ватанимдан, оиламдан олисда бўлсам ҳам бир кун ҳам ўзимни ёлғиз сезмадим. Мактабдаги жамоа у ердаги меҳрибон инсонлар менга керакли барча шароитни ортиғи билан таъминлаб беришди. Худди уларни аввалдан танийдигандайман. Бунинг учун уларга ўз миннатдорчилигимни билдираман.

– Ўзбекистон ҳақидаги илиқ фикрларингиз учун раҳмат. Айти пайтда юртимизда таълим соҳасида олиб борилаётган ислохотлар, таълим тизимидаги ўзгаришлар, мактаблардаги шарт-шароитлар ҳақида нима дея оласиз?

– Президентингиз ўз халқининг келажаги учун астойдил курашмоқда. Бу йўлдаги ислохотларни айти таълимдан бошлагани ажойиб ечим бўлди. Мен Ҳиндистондаги Президентингизнинг хорижий ўқитувчилар билан Zoom орқали ўтказган учрашувида иштирок этдим. Ушанда жаноб Президент 2023 йилни сифатли таълим йили бўлишини, бунинг учун эса барча шароитларни яратишини айтган эди. Келиб кўрдим-ки, ҳақиқатдан ҳам шундай. Мен жаноб Мирзиёевнинг бу ҳаракатларини қадрлайман ва астойдил меҳнат қиламан ва билдирган ишончларини оқлашга ҳаракат қиламан.

– Даня айтингиз, ҳинд ўқувчилари ва ўзбек ўқувчилари ўртасида қандай ўхшашликлар ва тафовутлар бор? Умуман, сизлардаги таълим тизими ва биздагиси ўртасида қандай фарқлар бор? Шулар ҳақида гапириб берсангиз.

– Ҳинд ва ўзбек ўқувчилари ўртасида унчалик катта фарқи сезмадим. Уларнинг ҳаммасининг ўз орзулари ва мақсадлари бор. Кимдир шифокор бўлмоқчи, кимдир таржимон яна кимдир эса архитектор. Ўзбек болаларини худди ўз боламдай қабул қилдим. Улар ҳам менга худди ўз яқин кишисидай муомала қилишяпти. Улар билан жуда тез тил топишиб кетдим. Ўқувчиларнинг кўпчилиги инглиз тилини ўрганишга қизиқар экан. Шу сабабданми, дарсларимни диққат билан кузатишяпти ва ўзлаштиришга астойдил ҳаракат қилишяпти. Бу эса ўз навбатида яхши натижаларга олиб келишига ишонаман.

Таълим тизимларимиздаги тафовутга келадиган бўлсак. Ҳиндистон мактабларидаги асосий тил бу – инглиз тили. Дарсларнинг асосий қисми инглиз тилида ўтилади. Бизда болалар инглиз тилини боғчадаёқ ўрганишади. Биринчи синфга келганларида инглиз тилини билган бўлишлари шарт. Шу сабабдан бўлса керак мактабни тугаллаган ҳар бир ўқувчи инглиз тилида бемалол гаплаша олади. Уйлайманки, тез орада сизнинг юртингиз ўқувчилари ҳам шундай натижаларга эришишади.

– Юқорида мактаблардаги шарт-шароитлар ҳақида гапириб ўтдингиз. Айтингчи, сизга ўқувчиларни инглиз тилида сўзлашишга ўргатишда булардан ташқари яна нималар етишмаяпти? Агарда бу борада таклифларингиз бўлса айтиб ўтсангиз.

– Юқорида таъкидлаганимдек, давлатингиз раҳбари мактабларда етарлича шарт-шароитлар яратгани таҳсинга лойиқ. Инглиз тили хоналари барча керакли жиҳозлар ва ўқувчилар бепул дарсликлар

билан таъминланган. Мен дарсдан ташқари гуруҳлар билан ишлаганимда уларга инглиз тилидаги бадий адабиётларни ўқиш учун тавсия қилганимда, улар бундай китоблар кутубхонада йўқлигини айтишди. Кейин ўзим кутубхонага бордим. У ерда ўзбек ва рус тилларида ёзилган бадий адабиётлар борлигини кўриб сеvindим. Аммо инглиз тилида ёзилган адабиётларни учратмадим. Агар имкони бўлса, кутубхоналар инглиз тилидаги бадий адабиётлар билан бойитилса, ишимиз анча илгари одимларди. Болалар бундай китобларни ўқиш жараёнида инглиз тилини тезроқ ва самаралироқ ўрганишарди.

– Ўзбекистон ўқувчиларининг келажаги ҳақида астойдил қайғураётганингиздан ва уларга юксак даражада таълим бераётганингиздан жуда хурсандимиз. Сизга бу ишларингизда омад тилаймиз ва яхши натижалар кутиб қоламиз. Ишонамизки, сиз билан бирга юртимизга ташриф буюрган мутахассислар фарзандларимизга инглиз тилини чуқур ўргатишда катта натижалар кўрсатадилар.

– Раҳмат. Албатта, бунинг учун астойдил ҳаракат қиламан. Юртингизда устоз ва мураббийларга берилаётган эътиборни кўриб жуда сеvindим. 1 октябрь – ўқитувчи ва мураббийлар куниди давлат томонидан уюштирилган байрам тадбирларига таклиф қилиндим ва жуда мамнун бўлдим. Бунинг учун давлатингиз раҳбарига ўз миннатдорчилигимни билдирмоқчиман. Устозга шунчалик эътибор берилаётган юртининг фарзандлари албатта билимли ва етук мутахассис бўлиб етишишга ишонаман.

– Қимматли вақтингизни биздан аямаганингиз ва самимий фикрларингиз учун ташаккур. Ўзбекистонга хуш келибсиз!

Бу йили юртимизга хорижий тилларни ўргатиш учун 500 нафар ўқитувчи жалб қилинган бўлса, келгуси йилда яна 1500 нафари олиб келиниши кўзда тутилган. Мен ҳозирги замон ёшлари учун яратилаётган шароитларни кўриб тўғриси жуда ҳавас қиламан. Давлатимиз раҳбари шунча маблағ эвазига мактабларга чет элдан устозларни олиб келса-ю, бундан унумли фойдаланмасак албатта, катта хатога йўл қўйган бўламиз. Унумли фойдаланиш деганда мактабда таълим олаётган ҳар бир ўқувчининг ота-онаси, синф раҳбари ва инглиз тили ўқитувчилари назарда тутилмоқда. Яъники ҳар бир ота-она мактаб билан узвий боғлиқ бўлса, фарзандининг дарсларда қатнашишидан, ўзлаштиришидан берилаётган имкониятлардан фойдаланаётганидан бохабар бўлса ва бу жараёнларда бевосита иштирок этса, албатта кўзланган натижаларга эришилади. Акс ҳолда, ҳаммаси бефойда кетади. Ота-оналар астойдил фарзандининг мактабда кераклича билим олиши ҳақида қайғурса ва назорат қилса, ўқитувчилар етарлича билим берса, албатта бизнинг юрт фарзандлари ҳам ривожланган давлатлардаги каби етук мутахассислар бўлиб етишишади. Бунинг учун барча шарт-шароитлар мавжуд. Ўқувчидан фақат бир нарса талаб қилинмоқда, у ҳам бўлса фақат ўқиш ва изланишдир.

Нафиса



UNWTO

БОШ АССАМБЛЕЯСИ СЕССИЯСИ ИЛК БОР ЎЗБЕКИСТОНДА ЎТКАЗИЛДИ

Жорий йил Самарқандда Туризм ташкилоти Бош Ассамблеясининг (UNWTO) 25-юбилей сессияси бўлиб ўтди. 5 кун давом этган ушбу сессия доирасида “Халқаро инвестиция” ва “Халқаро таълим” форуми ва “Энг яхши туризм қишлоғи” танлови тантанали ўтказилди. Унда 140 нафар хорижий, 120 нафар маҳаллий журналистлар иштирок этиб, семинар ва тадбирларни кенг миқёсда ёритишда ўз ҳиссаларини қўшишди. Бундан ташқари, сессияда 80 га яқин туризм вазирлари ва 24 нафар вазир ўринбосарлари бевосита иштирок этишди.

Мазкур сессияни давлатимиз раҳбари Ш.Мирзиёев очиб берди ҳамда бир қанча туризм ва уни ривожлантиришга қаратилган таклифлари билан чиқиш қилди. Давлатимиз раҳбари ўз нутқида халқаро миқёсдаги тадбирнинг юбилей йиғилиши Буюк ипак йўлининг дурдонаси, Янги Ўзбекистоннинг йирик сайёҳлик маскани бўлган ушбу қадимий шаҳарда ўтказилаётгани чуқур рамзий маънога эга эканлигини алоҳида таъкидлаб ўтди.



Азиз АБДУҲАКИМОВ,
Ўзбекистон экология, атроф-муҳитни муҳофаза қилиш ва иқлим ўзгариши вазир:

– Президент Шавкат Мирзиёев туризмни ҳукумат кун тартибида биринчи ўринга қўйиб, уни Ўзбекистонда иқтисодий ўсишнинг ҳаракатлантирувчи кучларидан бирига айлантirdи. Кейинги йилларда тизим-

ли ислохотларнинг амалга оширилиши иқтисодий-либераллаштириш, тадбиркорлик фаолияти учун қулай шарт-шароит яратиш, ҳуқуқий кафолатларни мустаҳкамлаш имконини берди, деб ўйлайман. Дунёнинг 100 га яқин давлати учун виза расмийлаштируви соддалаштирилгани туфайли Ўзбекистонга келаётган хорижий сайёҳлар сони ҳар йили 30-40 фоизга ошиб бормоқда. 2022 йилда бизга 5,2 миллион сайёҳ ташриф буюрган бўлса, 2023 йилнинг дастлабки уч чорагида биз 7 миллион меҳмонни қабул қилдик, 2024 йилда эса 10 миллион халқаро сайёҳ келишини кутмоқдамиз.

Мария ФРАНС,
Конго Маданият, санъат ва туризм вазир:

– Африка билан туризмни борди-келдидан бошқа бирор йўл билан ривожлантира олмайсиз. Африка давлатлари ва Марказий Осиё ўртасидаги туризм алоқалари – ўлик ҳолатда. Масалан, Конгода атроф-муҳит, флора ва фауна жуда экзотик. Бизда туризмнинг асосий йўналиши шу. Биз икки ўртада сайёҳликни фақат борди-келди билангина ривожлантира оламыз. Мана мен келдим, эндиликда сиз ҳам Конгога боришингиз керак.



Сара НОШАДИ,
БМТнинг Таълим, фан ва маданият масалалари бўйича ташкилоти (ЮНЕСКО) нинг Ўзбекистондаги ваколатхонаси раҳбари:

– Мамлакатингизда тарихий мерос ва обидаларни асраб-вайлаш, тарғиб қилиш бўйича амалга оширилаётган чора-тадбирлар туризмни ривожлантиришга, бунинг натижасида мамлакат иқтисодий тараққиётига улкан ҳисса қўшаётгани қувонарли ҳол. Маданий ва тарихий меросни муҳофаза қилиш ЮНЕСКО фаоли-



ятининг ажралмас қисми бўлиш билан бирга Ўзбекистоннинг энг муҳим бойлиги ҳамдир.

Хамат Нгаи Кумба БАХ,
Гамбия туризм ва маданият вазир:

– Марокаш ва Туркия орқали Гамбиядан Ўзбекистонга етиб келишимиз учун 24 соат вақт кетди. Шаҳар аэропортига биринчи кўнганимизданок Самарқанднинг гўзаллиги мени ҳайратда қолдирди.

UNWTO Бош ассамблеяси доирасидаги режалаштирилган учрашув ва музокаралар чоғида туризм, сармоя ва таълим соҳаларида аниқ шартномалар тузиш ниятидамиз. Гамбия фуқаролари Ўзбекистонда ўқиб, тажриба орттиришини истади. Умид қиламанки, келгусида ҳамкорлигимиз янада юқори босқичга чиқади.

Софи ИБОТСОН,
Ўзбекистон сайёҳлик брендининг Буюк Британиядаги элчиси:

– UNWTO Бош Ассамблеясининг юбилей сессияси Ўзбекистон учун муҳим бўлишининг икки сабаби бор. Бу ерда биринчи навбатда бутун дунёдан сайёҳлик маъмуриятлари вакиллари йиғилган. Бу Ўзбекистонга нафақат халқаро туризм сиёсатида ҳисса қўшиш, балки келгуси икки йил давомида уни шакллантириш имкониятини ҳам беради. Иккинчидан, Ўзбекистон ўзининг меҳмондўстлиги ва MICE туризми йўналишини намойиш этиш имкониятига эга бўлмоқда. MICE – бу бизнес учрашувлари доирасидаги конференциялар ва тадбирлардир. Бу Ўзбекистонда ривожланган туризм тури эмас лекин келажакда ривожланишига умид бор.

Роса Ана Морилло РОДРИГУЕЗ,
Испания туризм давлат котиби:

– Бугун биз Бутунжаҳон туризм ташкилоти ассамблеясини Испаниядан кейин юртингизда ўтказмоқдамиз. Менимча, бу йиғилиш жуда муҳим! Биз барча инвесторлар ва тадбир раисининг фикрларини эшитдик ва таклифларни қабул қилмоқдамиз. Ўзбекистон бугун туризм соҳасида дунёга ўз эшикларини очмоқда. Бунга ҳам инobatга олган ҳолда, келажакда кўплаб режаларимиз бор.



Мурод МИРЗАЕВ,
Нурота тумани, Сентоб қишлоғи МФЙ раиси:

– “Энг яхши туризм қишлоғи” номинацияси бўйича Навоий вилояти, Нурота тумани, Сентоб қишлоғи ғолибликни кўлга киритди. Қарийб 3 минг аҳоли истиқомат қиладиган бу қишлоқ сўлим табиати билан қадимий цивилизация масканларидан бири ҳисобланади. Қишлоқ бўйлаб сайр қилар экансиз,



ноёб ва пухта ўйлаб қурилган қадимий шаҳарга тушиб қолгандай бўласиз. Қоя тошларга ишланган V-VI асрларга оид петроглифлар, тоғ тепасидаги кўҳна кўрғон қолдиқлари, XI-XVIII асрларга оид тошга ўйилган ёзувлар ҳамда қишлоқнинг энг юқори нуқтасидаги Фозилмон кўли меҳмонларни ҳамisha қизиқтириб келади. Сентоб қишлоғидан 12 км. узоқликдаги “Қора тоғ” қоятошларида кўплаб кўҳи услубдаги араб графикасидаги ёзувлар, Қуръон оятлардан фрагментлар ҳамда қадимий кўрғонларни ўраттиш мумкин.

Амалга оширилган иш ва лойиҳалар ҳақида

Салкам 100 та мамлакат фуқаролари учун Ўзбекистонга визасиз кириш тизими қўлланилмоқда. Яна 55 та давлат фуқаролари учун соддалаштирилган электрон виза тартиби жорий этилди.

Сайёҳлик бизнесининг барча турларини юритиш учун қулай шарт-шароитлар яратилди. Солиқ ва



божхона имтиёзлари тақдим этилди, кредит ва молиявий ёрдам кучайтирилди.

Янги меҳмонхоналар қуриш ва халқаро брендларни жалб этиш, сайёҳлар оқимини кўпайтириш учун субсидиялар ажратилмоқда. Шу туфайли пандемия чекловларига қарамасдан, икки йил давомида 800 та инфратузилма лойиҳаси амалга оширилди. Биргина Самарқанд шаҳрининг ўзида туристик инфратузилмани яхшилаш учун 1 миллиард доллардан ортиқ маблағ инвестиция сифатида киритилди.

Сайёҳлар учун қулай шароит яратиш мақсадида меҳмонхона ўринлари сони 140 мингга етказилди, 70 та янги сайёҳлик маршрути очилди, 6 та хусусий авиакомпания иш бошлади.

Сайёҳлик соҳасида профессионал кадрларни тайёрлашга катта эътибор қаратилмоқда. Ўзбекистондаги 35 та олий таълим муассасасида халқаро стандартлар асосида малакали мутахассислар тайёрланмоқда.

Юртимизга келаётган хорижлик сайёҳлар сони икки баробар кўпайди. Туризм экспортдан тушаётган даромад 4 баробар ўсди. Мисол учун, сайёҳлар сони бу йил Япониядан – 5 баробар, Ҳиндистон ва Италиядан – 3,5 баробар, АҚШдан – 2 баробарга ортди. Шу билан бирга, мамлакатимиз АҚШнинг “National geographic traveler awards” рўйхатида “Йил янгилиги” ҳамда “Гастрономик туризм” номинациялари ғолиби бўлди. Ўзбекистон ўтган йили “Жаҳон мусулмон сайёҳлари индекси”да “энг кучли саёҳат йўналиши” сифатида тан олинди.

Маълумот ўрнида шуни айтиш жоизки, Шавкат Мирзиёев 2025 йилни UNWTO доирасида “Бутунжаҳон инклюзив туризм йили” деб эълон қилишни таклиф этди. Шу билан бирга Самарқандга “Маданий туризмнинг халқаро пойтахти” мақомини бериш тўғрисида декларация ҳамда Халқаро туризм академиясини ташкил этиш тўғрисида битим қабул қилинди. Хужжатлар Ўзбекистон Республикаси экология, атроф-муҳитни муҳофаза ва иқлим ўзгариши вазир А.Абдуҳақимов ва UNWTO бош котиби З.Пололикашвили томонидан имзоланди.

Дилнура МАМАСАФОЕВА тайёрлади

ШУХРАТ ДАРЁ:

“ДАРЁНИНГ СУВИ ЧУЧУК БЎЛАДИ”

Шухрат Дарё! Ҳа, ўша елкасида гитарасини кўтариб, ҳокисоргина бўлиб давраларга кириб келади ва даврани “ёндириб” юборадиган хонанда. У куйлаганда қўшилиб, ижро этгинг келади.

– Ярми ҳазил, ярми чин савол... Нима учун Шухрат Уммон ёки Шухрат Денгиз эмас, айнан Шухрат Дарё?

– Дарёнинг суви чучук бўлади (кулиб)... Яна орзуга айб йўқда, дарё каби қўшиқлар яратсам, дердим. Акам санъатни жуда қадрлар эди. Менинг санъатга бўлган меҳримга ҳам акам сабабчи бўлган. Мен истаган пластинкаларни, аудио-видео кассеталарни акам доим олиб берарди. Муסיқий дидимни шаклланишида, санъатнинг сир-асорларини ўрганишимда айнан ўша болалиқдаги, ёшлик йилларимдаги эшитган қўшиқларим сабаб бўлди.

– Санъаткор қайсидир маънода олқишлар билан нафас олади... Машҳурлик сари интилади. Назаримда сиз ижодни сал кечроқ бошладингиз?

– Мен аслида шифокорман. Узоқ йиллар шу соҳада ишладим, маълум маънода бурчимни адо этдим. Лекин санъатга бўлган меҳр-муҳаббат барибир мени домига тортди. Икки соҳани параллел олиб бориш... бу ниҳоятда қийин. Кўнглим эркинлик, хотиржамлик истаганида гитарани олиб, юракка яқин шоирларнинг шеърларни куйга солар эдим. 1999 йилда шоир Муҳаммад Юсуфнинг “Бахтлимисан севгилим?” шеърини куйга солиб, танловда иштирок этганман. Иккинчи ўринни олганман. Эслайман ўшанда композитор Анор Назаров: “Шухратжон бунинг муסיқасини ким ёзди?”, деб сўраганларида: “ўзим ҳаракат қилгандим”, деб жавоб берганман. Шунда кичкина ижодимга юксак баҳо берган ва устоз “олға” деган. У пайтларда ҳали шифокорлик билан шуғулланардим. Келажгимни тўлиқ санъат билан тасаввур қилолмаганман. Фурсат ўтиб “Муаллифлик қўшиқлари фестивали” бўлиб ўтди. Шунда мен босқичма-босқич иштирок этиб, Гран-при соҳиби бўлгандим. Кўпчилик энди Шухрат ўзини бутунлай санъатга уради, шифокорликни ташлайди, деб ўйлаган. Кейин халқаро фестивалда иштирок этдим. Лекин ўзимни ўзим хонанда сифатида тан олишим қийин бўлган. Профессинал саҳнага 1999 йилда чиққан бўлсам, 2006 йилда англаб етдимки, мен куйлашим керак экан! Шу тариқа менинг санъатдаги ҳаётим бошланди.

– “Туташ тақдирлар” сериалидаги саундтрек жуда оммалашган эди. Умуман сиз ижодингиз аввалида фильмлар учун куйлаганингиз эсимда...

– Ҳа, мен бир неча кинолояҳаларда куйладим. “Туташ тақдирлар”ни бир тўй хизматида куйлаганман. Кейин ўтирган меҳмонларнинг ўзаро “худди ўзига ўхшаб айтар экан-а”, деганларини эшитдим. Аслида бу менинг ашулам! Ўшанда англадимки, сени овозинг билан бирга ўзингни ҳам танишлари керак. Кейин қўшиқларни клиплар билан тақдим эта бошладик.

– “Кўйлақлари билан чўмилган қизлар”... ажойиб ижро ва ўзига хос клип кўпчиликка манзур бўлганди...

– Ҳа, лекин кўпгина танқидлар ҳам бўлган! Яна менинг фақат хос давраларда янграган қўшиқларим бор. Уни кўпчилик билмайди, клиплар суратга олинмаган. Эркин Воҳидовнинг “Япон нега юз йил яшайди?” деган шеърини қўшиқ қилгандим. Шеър жуда яхши эди. Аммо бундан анча йиллар аввал катта давлат тадбиридан мени олиб ташлашган. “Нима учун?” деб сўрасам “Япон” деган қўшиғингиз учун”, деган жавобни олгандим. Мана шундай саводсиз танқидлар одамни чарчатади. Лекин ўринли эътирозлар икки томон учун ҳам фойдали бўлади. Яна биласизми, ижодкор қалбидан кечганларини ижро этиши шарт.

– Ўзингиз танқидий фикрларингизни баён этиб турасизми?

– Агар мен қаердадир танқидий фикр билдирган бўлсам, фақат битта масалага қаратилган бўлади. Бу – плагиат! Мен ижодда хилма-хилликни ёқтираман, лекин плагиатни ҳеч қачон қўллаб-қувватламайман!

– Плагиатдан қочиш, ижодда хилма-хилликка эришиш еттита нота билан осон эмас дейдиганларга нима дейсиз?

– Бу илм! Етти нота ўзини транспозициялари бор! Етти товушнинг ҳар бирини бимол ва дийзларини ҳисобласак, яна уларни учга кўпайтиринг. Яна октавалар бор... Бор-йўғи етти нотаку, деб қараш хато! Яна айтаман бу илм, изланиш, ўрганиш керак. Илмсизлик – таназзулга етаклайди.

– Бугун гитара билан куйлайдиган кўпайди... Бу жараёнга сизнинг муносабатингиз қандай?

– Бу ҳам жараён, талаб. Мен ҳар бир жараёнда классика тарафдориман. Тоза овоз, тоза ижро мен учун муҳим. Аммо бугун хаста овозлар, гитарани уриб чалишлар урфга кирди. Ҳақиқий муҳлис асл ижрони топиб олади. Бу жараён таққослаш имконини ҳам беради. Умуман ҳар бир вазият вақт билан курашади. Синовдан ўтгани қолади!

– Шухрат Дарёдан гитарасини олиб қўйишса...

– Менда имкониятлар бор. Гитарани олиб қўйсангиз рубоб билан айтаман. Агар рубобни ҳам кўп кўришса аккардион чалиб айтаман. Аккардионни ҳам олиб қўйсангиз (кулиб) шиқилдоқ борку, ўшани чалиб айтаман!

